

Moekes Potjemeel

Moi lu,

Ik wol ais even weer wat van mie heuren loaten, k docht t kin nog net op leste dag van Meermoand-Dialectmoand. Din mout ie t vanzulf wel lezen as n Grunneger, want bie de Vraizen kin t din net nait.

Joa lu, t is al weer n joar leden en zo zain ie mor dat tied oardeg gaauw gait. Mor as ie aal weken t Bokkeblad lezen, hebben ie ook vast wel vernommen dat lu van waarkgroep Streektoal en Literatuur nog aaltied heur best doun om ons Grunneger Toal aan te peerdtjen. Aal joar kriegen weer vieftien lu, gelegenhaid om aan de cursus Grunnegs mit te doun en doar binnen nog aaltied laifhebbers veur. Aander week 5 april goan ze weer mit n mooi certivikoat noar huus. Maisten begunnen nou ook al mit t schrieven, al vaalt dat voak nog nait mit. Doarom hebben wie in Meertmoand, onder ale (old) cursisten t eerste Grunneger dictee holden in Slochter. Op t ploetje verleden week in t Bokkeblad hebben ie ze apmoal zitten zain te swaiten mit meester Henri Wierth der veur. Hai haar n mooi verhoal in mekoar zet, woar wie ons op uutleven konden. k Heb din ook n poar moal de kreet heurd: 'Nou wait k presies wat k der van leerd heb'. En dat was ook meester zien bedoulen, mor even zoveul gef t ook n bult plezaaier om mit te doun.

Dit joar is gemainte Hoogezand weer aan de beurt veur de Grunneger schriefwedstried, t zel mie ais benijen, houveul wazzen lu en veuraal... kinder uut ons gemainte Slochter mitdoun. Wie zellen t vanzulf wel heuren.

Zo lu ik mag t nait te laank moaken, wel wait kom k nog es n moal weer. He je ook al zain hou mooi of de poaskebloumen aan d'Woudbloemloan bliuen? t Liekt wel of ze der nou al feest hebben, dat kin nog wat worden.

Ik wins elkenain vaast goie Poasdoagen en n hail mooi veurjoar!

Liny Brink-Zandstra, moi hur!

Moekes Potjemeel is een initiatief van de Culturele Commissie van de gemeente Slochteren, werkgroep Streektaal en Literatuur.